

AKASHVANI AIZAWL

HEADLINES (EVENING)

1. Lawngtlai khawpui-ah tuihri ni ngei kai a rinhlelh mi 2 an thi a, he hri kai a rinhlelh mi 5 damlo an awm mek.
2. Vawiin atang khan kumin Krismas leh Kum thar vuakveta Aizawl khawpui chhunga chakkhai dapa ke a kalte him zawk na'n lirthei tlan lohna hmun No Vehicle Zone chu kalpui tan a ni.
3. India chuan cyclone Ditwah tuar nasa Sri Lanka hnenah indintharna turin dollar maktaduai 450 a pe dawn
4. President Droupadi Murmu chuan vawiin khan New Delhi-a Rashtrapati Bhavan ah Rashtriya Vigyan Puraskar 2025 a sem



CHOLERA

Lawngtlai khawpui-ah tuihri ni ngei kai a rinhlelh damlo mi 2 an thi a, he hri kai a rinhlelh mi 5 damlo an awm mek.

Lawngtlai district bawrhsap Pu Donny Lalruatsanga'n Akashvani News Aizawl a hrilh danin Lawngtlai khawpui-ah tuihri ni ngei a rin vei mi 2 tun hnai-ah an thi a. Thite hi tuihri vang a ni tih finfiahna chiah a la awm lo na chungin an nat dan leh a natna lanchhuah danah a hma lama Lawngtlai district a Kakichhuah khua a mi 6 thihna chhan tuihri ni ngei a rin a ni a. Chubakah Lawngtlai College Venga Lairam Christian Medical Centre (LCMC) Hospital-ah tunah hian tuihri vei ni ngei a rinhlelh mi 5 enkawl mek an ni bawk. Hei hi thil awmdan a nih avangin bawrhsap Pu Donny Lalruatsanga chuan vawiin khan hri leng darh zel tur venna atan thu leh awm hma atan Lawngtlai district leh ramdang inkalpawhna (international border) zawng zawng thu leh awm hma atan khar vek a nih thu a chhuah a. Ram dang nena insumdawnna reng reng kalpui phal a nih loh thu a chhuah bawk.

Thupek hi Epidemic Diseases Act, 1897 section 2 leh Bharatiya Nagarik Suraksha Sanhita (BNSS), 2023 section 163 in thuneihna a pek angin bawrhsap hian a chhuah a. Thla hnih chhung atan thu leh awm hma chu kenkawh tur a ni a. Dan bawhchhiate chu Bharatiya Nyaya Sanhita (BNS), 2023 section 223 hmanga hrem theih an ni ang.

Bawrhsap chuan Lawngtlai a damdawi-in awm zawng zawngte chu tuihri vei ni a hriat damlo te a hranga dahna tur isolation ward ruahman vek turin a hriattir

bawk a. Mipuite chu natna hrik laka invenna atana kut silfai bakah tui chhuanso emaw filter emaw chauh in tura thurawn a tichhuak bawk.

<><><>

LADC

December 3 a Lai Autotomous District Council (LADC) inthlana thlan tlin member of district council (MDC)-te chu vawiin khan larsap Gen. Vijay Kumar Singh chuan Raj Bhavan-ah a kawm.

Raj Bhavan atanga thu dawn danin MDC thlan tharte hi legistature party hrang hrang mite larsap chuan a hrang theuhin a kawm a. LADC a sorkar intawm siam tuma hmala mek ZPM leh MNF te chu an thawhhona legislature party Lairam Legislature Party (LLP) anga a hu hova kawm lovin a hrangin ZPM legislature party leh MNF legislature party-te a kawm a ni. LLP-in LADC-a sorkarna an siamna atan hian ZPM leh MNF-in an hruaitu atana an thlan ZPM hruaitu Pu T. Zakunga leh amah thlawptute chuan sorkarna an siam theih thu hi District Council & Minority Affairs department kaltlangin larsap hnenah a hriattir tawh a. Larsap hian chief executive member (CEM) atan Pu T. Zakunga hi a ruat tura ngaih a nih lai-in hriattirna chhuah a la awm rih lo ni a hriat a ni.

Nimin khan LADC a MDC thlan tlin thar mi 24-te hi protem chairman Pu Lallura Chinzah chuan Lawngtlai khawpuia LADC Hall-ah thu tiamtirin a lalut tawh a. Hemi hma zing lam khan protem chairman atana larsapin a ruat Pu Lallura Chinzah hi Lawngtlai district bawrhsap Pu Donny Lalruatsanga chuan he hall-ah vek hian thu tiamtirin protem chairman atan hian a lo lalut tawh bawk a ni.

Puan tawh thin angin December ni 3-a member 25 awmna LADC inthlanah khan MNF chuan MDC ngah berin bial 8-ah hnehna an chang a, mahse, an party malin sorkarna an siam thei lova, MDC 13 tal neih a ngai a ni. Inthlan hma a an thawhpui, result puan hnu a MDC 7 nei ta Congress chuan inthlan result puan ve leh MNF hi thlau thla-in Congress MDC Pu C. Ngunlianchungka kaihhruai Congress leh ZPM sorkar intawm siam tumin tan an la a. Mahse, ZPM nena an inbiak mek lai-in ZPM chuan MNF thawhpui tura thutlukna siamin LLP hi an din ta a ni.

<><><>

NO VEHICLE ZONE

Vawiin atang khan kumin Krismas leh Kum thar vuakveta Aizawl khawpui chhunga chakkhai dapa ke a kalte him zawk na’n lirthei tlan lohna hmun No Vehicle Zone chu kalpui tan a ni.

Kan Corr in a sawi danin hetiang a lirthei tihpalh hlauhawm lova ke a kal hi mipui-in an hlut hle a, mi tam tak kein Aizawl bazarah an kal a ni. Coordination Committee on Traffic Management-in a ruahman angin Krismas hma bikah chuan vawiin leh naktuk, urlawk ni-ah te No Vehicle Zone hi Chanmari leh Zodin Square inkarah zing dar 10:30 atanga tlai dar 4:30 chhungin kalpui tur a ni a. Kumthar dawnah ni 31-ah kalpui a ni dawn bawk a ni. Vawiina No Vehicle Zone kalpuiah hian mipui tam tak kein an bazar nghal a. Nidanga lirthei dahna leh lirthei tlanna hmunah mi tam takin thil zuarin a inphochhuak a, naupang te infiamna leh ennawm hrang hrang phochhuah a ni bawk a ni. Vawiina No Vehicle Zone-ah hian Chief Minister Pu Lalduhoma hovin Christmas Costume Parade pawh huaihawt a ni a. No

Vehicle Zone kalpui chu mi thenkhat tan harsatna siamtu ni thei mahse zalen taka mipuite bazarna atana hmalakna tha tak a nih thu vawiin-a bazar a kal chuan Akashvani a hrilh a ni.

No Vehicle Zone kalpui mekah hian lirthei tlan tawpna pahnih Chanmari leh Zodin Square-ah te traffic police thahnem takin an vil a. Lirthei te chu an miphurhte an dah tir hnuah tlantir leh zel an ni a. Heng hmun pahnih atang hian mipuite kein an kal tan a ni.

No Vehicle Zone hian Emergency duty bakah, natna avanga Damdawiin pante a huam lo a. Coordination Committee on Traffic Management te chuan lirthei a chuang te chhukna tur bakah lirthei chi hrang hrang hunna tur ruahmanna an siam bawk a ni.

<><><>

CHARITY

Champhai Vengthlang kohhran Thalai, KTP branch chuan vawiin khan Krismas leh kumthar bazar a kal te, a thlawnin thingpui leh chhang an pe.

Champhai Vengthlang KTP branch hian Champhai Vengthlang kohhran biak in tual, Krismas Bazar-kiangah a duh apiangin hnenah thingpui leh chhang an pe a, kum 13 lai hetiang ni, ‘Serving Day’ an tih hi an lo hmang tawh thin a, Vawiinah hian mite tana luanchhuahna hun hi a tum 14-na atan an hmang leh ta a ni.

Kum 2012 atang khan Kum tin an project ah telhin, Krismas Bazar a kalte thingpui leh a hmeh pekna tur hi budget hranpa siamin, kumin hian Rs.80,000/- an ruahman niin, kum tinin mi 2,000 atanga 3,000 velin an thingpui ruai hi an chhim thin niin an Branch Secretary Pu J. Lalmuanpuia chuan a sawi.

<><><>

MASS SHOPPING

Nikhat chiahin Krismas a dang tawh a, Lunglei khawpui chu Krismas lawm turin tisa leh thlarau lamah inbuatsaihna in a vawrtawp a thleng chho mek.

Krismas boruak siamtu ber pakhat, thawmhnaw leh second-hand zuarte Super Market hmunah Lunglei Municipal Council (LMC)-in inpho an phal loh avangin thawmhnaw zawrhna mumal a awm lova, mi vanrandah leh hmun remchang laiah sumdawng te hian an thawmhnaw an zuar a ni. LMC hian Lunglawn mualah in zuar turin an ti a, mahse hei hi thawmhnaw zuartu tam zawkte’n an duh lova. Super Market hmun velah Police an awm reng bawk si vangin mi tam takin thawmhnaw lei tur a kalna tur ber an hre lova. Chutih rualin thawmhnaw zuartu engemawzat an in zuar thei lova, thenkhat chuan an pheikhawk zawrh te a man chanve a tihniamin inzawrhna mumal a awm si lo tiin nasa fe a an tihtlawm thu an sawi ve bawk a ni. Sumdawng tam zawkin kumdang ai-in inhralh a harsa tih an sawi a, ‘LMC hian chem lovin kan lu an la’ ti te pawh an awm a ni.

Hetihlai hian LMC chuan LMC huam chhung a kawn chei tha hnenah lawmman a siam chu zanin dar 7 hian Convention Auditorium-ah semna hun hman a ni dawn. Kawn/veng chei na’n hian MLA te leh Councillor te pawhin anmahni bial leh vengah te pawisa an thawh bakah veng chhung YMA te pawhin a tul ang in sum an thawh hlawm a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

HEROIN SEIZURE

Lunglei Police district special branch te chuan beihpui an thlakna-ah zan dar 8:30 vel khan Zobawk-ah heroin ni ngeia hriat Hawng 5 a vaiin gram 45 chuang chu Rosangliana (22) Thingsai Penveng, Hnahthial Dist. a cheng ni a inchhal kut atangin an man a. Heng bakah hian mobile phone pakhat a kut atanga man tel a ni bawk a. He ruihhlo ni ngeia hriat kengtu hi man nghal niin, dan anga hma lak turin LLI Police Station-ah Narcotic Drug & Psychotropic Substances Act, 1985 section 21(b) hmanga thubuai ziahluh a ni.

Nizan vek dar 10:00 vel khan Champhai Zote leh Tiau lui inkar-ah Excise & Narcotics hnathawkte chuan heroin gram 23 chuang an man a. Heroin phurhna atana hman Alto Car pawh man tel nghal a ni. He mi kaihnawih ah hian Vanlalawmpuii (38) Dinthar Veng, Champhai ni a inchhal leh Lalrinpuia (23) Vengthlang, Champhai bakah Malsawmtluanga (25) Khankawn Police check gate bul, Champhai ni a inchhal te chu an man nghal an ni.

Ruihhlo avanga man hi The Narcotics Drugs & Psychotropic Substances Act 1985 dan tlawhchhan in thubuai siamsak an ni a, District & Session Court, Champhai ah hruai nghal a ni.

<><><>

UNATURAL DEATHS

Aizawl District Police- District Executive Force (DEF) chhinchhiah danin kumin hian Aizawl district chhungah sarthi 158 an awm.

Kumin January atanga December-ah ni 17 thleng khan Aizawl District ah sarthi 158 an awm a, chung zinga mi 36 chu damdawi/ ruihhlo hmansual vang a thi an ni. Mahni intihlum mi 30 leh tuitla 12 an awm a, midang 78 chu chetsualna (accident) hrang hrang vanga thi leh thih chhan hriat chian lohte an ni.

Aizawl DEF chuam chhungah kumin chhungin CEIR portal hmangin mobile phone bo 745 hmuh let a ni a, phone bote chu a neitute hnenah pet let nghal zel a ni. Aizawl District-a police station zingah Bawngkawn PS ah phone bo hmuh let tam berin, 318 a ni a, Sialsuk PS, Darlawn PS leh Sakawrdai PS-ah te phone bo hmuh let a awm lo thung.

<><><>

INDIA-SRI LANKA AID

India chuan cyclone Ditwah tuar nasa Sri Lanka hnenah indintharna turin dollar maktaduai 450 a pe dawn. External Affairs Minister Dr. S.Jaishankar-a chuan vawiina Colombo-a chanchinbumite a kawmnaah chhawmdawlina pek tur thu hi a puang a. Chhawmdawlina pek tur zinga dollar maktaduai 350 hi line of credit niin dollar maktaduai 100 hi cyclone-in a nuai nasatna hmunte tana ruahman a ni a ti bawk. External Affairs Minister hian Sri Lankan President Anura Kumara Dissanayake chu vawiin khan hmuin cyclone-in Sri Lanka-a chhiatna a thlen dan kimchang takin a sawipui a. Prime Minister Narendra Modia lehkhathawn a hlan nghal bawk a ni.

Pu Jaishankar-a chuan Operation Sagar Bandhu hnuaiah India chuan Sri Lanka hnenah hian chhawmdawlina bungrua tonne singkhat leh sang khat chuang leh damdawi bakah hmanraw dang tonne 14.5 a pe tawh a ti a. Sri Lanka-in cyclone a tawrh hnua a indinthar lehnaah India chuan a thlawp tlat dawn tih a sawi bawk a ni.

<><><>

VIGYAN AWARD

President Droupadi Murmu chuan vawiin khan New Delhi-a Rashtrapati Bhavan ah Rashtriya Vigyan Puraskar 2025 a sem. He award hi science, technology leh innovation lama mi thawktha te hnenah hlan niin chi li ah then a ni a. Padma Vibhushan dawng tawh Prof.jayant Vishnu Narlikar chu a thih hnua chawimawina sang ber Vigyan Ratna hlan a ni a. Scientist 8 hnenah Vigyan Shree award, leh Scientist thalai mi 14 te hnenah Vigyan Yuva pek an ni a. Hei bakah hian Vigyan Team award chu Team Aroma Mission CSIR te hnenah hlan a ni bawk. .

<><><>